



**Aalisarnermut, Piniarnermut Nunalerinermullu Naalackersuisoq  
Landsstyremedlem for Fiskeri, Fangst og Landbrug**

Inatsisartunut ilaasortaq Ane Hansen  
MAANI

**Naalackersuisunut apeqqummut 95-imut akissut puisit amii pillugit  
ulloq 13. oktober 2008-imi isumasioqatigiinnermut peqataasimaneq  
tunngavigalugu**

Naalackersuisoqarfimma ulloq 20. oktober 2008-mi Naalackersuisunut apeqqutit tigusimavai, Naalackersuisut sunik suliniuteqarsimanersut aamma suliniuteqassamaarnersut EU-kommissionimit ileqqoreqqussassatut siunnersuummut attuumassuteqartumik, tassani puisinit tunisassiat kaaviiartitsissutigineqarnerat inerteqqutiginiarneqartoq kiisalu EU-mit eqquteqqussaajunnaassasut, aqqusaartitsineq aamma avammut nioqqutigineqarnerat inerteqqutiginiarneqartoq.

2008-95  
27. oktober 2008  
Postboks 269  
3900 Nuuk  
Oq/tel +299 34 50 00  
Fax +299 32 47 04  
aapip@gh.gl  
www.nanoq.gl

*1) Puisit amiisa EU-p iluani eqquteqqussaajunnaartinniarneqalernerisa kingunera-  
nik Naalackersuisut qanoq iliuusissamik maannamut qanoq suliniuteqarsimappat?*

1-imut) Aallarniutigalugu erseqqissaatigissavara, Naalackersuisunit annertooujussuarmik EU-mi puisinit eqqusseqqussaajunnaarnissamik pisoq ilungersunartutut isigineqarmat. Puisit amii pillugit suliami Naalackersuisut iliuusaat ukiuni kingullerpaani annertooujussuarmik anguniagaqarfiusimavoq. Uanga atorfillillu 2006-ip upernaavaniilli Nunanut allanut Ministeriaqarfik aamma Bruxelles-imi aallartitaqarfik qanimut suleqatigisarsimavagut pisunilu ataasiakkaani nunanik allanik puisinniartartuusunik suleqateqarluta, EU-mi nunanilu ataasiakkaani EU-mut ilaasortaasuni arlalinnik paasisitsiniaalluta ataatsimeeqateqartarlutalu iliuuseqartarsimavugut. Tamakku saniatigut 2006-imi "Atuagaq qaqortumik" taaneqartartoq Kalaallit Nunaanni puisinniartarneq pillugu suliarineqarpoq, taannalu arlalinngorlugu allakkatigut EU-mi inunnut nuimasunut nassiussuunneqarnikuvoq. Suliniutit tamakku ilaatigut kinguneraat, EU-mut akuersaarneqarmat arlalinnik misissuinissat ingerlanneqassasut ilaatigut toqutseriaatsitut periutsit atorneqartartut pillugit kiisalu inuuniarnikkut aningaasaqarniarnikkut misissueqqissaarnerit, EU-kommissionimit isummertoqannginnerani Parlamentip aalajangersagaliornissaanut puisinit tunisassiat EU-mut eqqunneqartarnerisa inerteqqutigineqalernissaat pillugu.

Suliaq Nunat Avannarliit Ministeriitut Siunnersuisoqatigiinni ataatsimiinnerni Naalackersuisunut ilaasortanit arlalinnit saqqummiunneqartarsimavoq. Atlantikup Avannaani Aalisarnermut Ministerit ataatsimiinneranni Kalaallit Nunaanni puisit puisinniarnermullu naleqassusianik pingaaruteqassusianillu nassuiaanikuuvunga, tassani ataatsimiinnermi EU aggersaasuusoq. Danskit Inatsisit

atuutsinneqarnerinut ministeriat ataatsimeeqatiginikuuvaa arlalinnillu Danmarkimi Canada-miut aallartitaannik ataatsimeeqatarsimallunga, tassani aamma Danmarkimi Aallartitaqarfitsinniit sinniisut aamma peqataapput.

Naalackersuisut Siulittaasuat Ministeriunermut allagaqarsimavoq, tassani EU-mi ineriartornermut Kalaallit Nunaata ernumassuteqarnera saqqummiunneqarluni, taannalu Naalagaaffeqatigiit ataatsimiinneranni oqallisigineqarluni. Tamakku qaavisigut Aningaasaqarnermut Nunanullu allanut tunngasutigut Naalackersuisoq Ilulissani EU-mit oqaloqateqarsimavoq september 2008-mi silaannaap allanngoriartornera pillugu ataatsimiinnermut atatillugu. Ilanngullugu Naalackersuisoqarfik tusagassiorfinnut nalunaaruteqarsimavoq Kommissionimi sunnersuutip akuersissutigineqarnissaani malinnaatitsinertut.

Naalackersuisoqarfik Nunanut allanut Ministeriaqarfimmik aamma Canada-miut aallartitaqarfianik ulloq 29. september 2008-mi oqarasuaatikkut ataatsimeeqateqarsimavoq, tassani illuatungeriit EU-mut tunngatillugu iliuuseqaqqinnissaminnik periusissatik ilisimatitsissutigalugit. Canada-miut oqartussaasuisa aamma Nunanut allanut Ministeriaqarfik attaveqarfigisimavaat suliniutit pillugit ilisimatitseqatigiinniartutik. Canada-p ilisimatitsissutigai EU-mi suliniutit WTO-mi attuumassuteqarneranut naammagittaalliutimik killiffia pillugu.

Naalackersuisoqarfik Great Greenland suleqatigalugu ulloq 13. oktober puisit amiinik suliffissuaqarfiup ajornartoornera pillugu isumasioqatigiissitseeersimavoq immikkullu sammisimallugit 2008-mi puisit amiinik tunisisitsisarnermi killiffik Aningaasaqarnermut Ataatsimiititaliamit aamma Aalisarnermut, Piniarnermut Nunalerinermullu Ataatsimiititaliamit kiisalu KNAPK-mit arlalinnillu peqataaffigineqartumik, Naalackersuisoqarfiup tungaanit pisatigut paasisstussat kiisalu EU-mit suliniutit taassumalu kingunerisinnaasai saqqummiunneqarput.

Kingullerpaamik Nunanut allanut Ministeriaqarfik aqutigalugu kalaallit/danskit isummersimanageri pillugit allakkiaqartoqarsimavoq aallartitaqarfikkoortunik EU-mi nunat ilaasortat naalackersuisuinut tamanut aamma nunat allat attuumassuteqartut naalackersuisuinut.

*2) Maannamiillu EU-parlamentip aaliangernissaa tikitsirlugu Naalackersuisut qanoq iliuuseqalersaarpat?*

2-mut) Puisit amiinit isertitatigut pissutsinit inuuniarnikkut aningaasaqarniarnikkullu misissueqqissaartoqarsimavoq, taannalu 2006-imi Inatsisartunut saqqummiunneqarluni, taamaattumik matumani imarisaa itisilissanngilara.

Peqqussutissami takuneqarsinnaavoq, ilaatigut inuit ilaatinneqannginnerat peqqussutip tamanut saqqummiunneqareernerani qaammatit arfinillit qaangiunnerani atortuulissasoq. Takuneqarsinnaavoq, inuit pillugit immikkoortortamut oqaaseqaatit naapertorlugit, erseqqissumik piffissami tassani kommissionip aamma Kalaallit Nunaata akornanni allaffissornikkut arlaannik isumaqatigiissutitut isikkulimmik isumaqatigiissuteqartoqassasoq qanoq iliorluni

Kalaallit Nunaannit avammut niuernerq aaqqissuunneqassanersoq. Taamaammat siunissami qanikannersumi eqqarsaatersuutigineqassaaq, Kalaallit Nunaanni qanoq ittumik aaqqissuussisoqassanersoq / allaffissornikkut ingerlatsisoqassanersoq. Matumani pisariaqarpoq suliffissuaqarfiup akulerutsinneqarnissaa.

Suli ilisimanngilavuttaa meqqilersuisalernissamik / uppernarsaasersuisarnissamik eqqussinermi allaffissornikkut aningaasaqarnikkullu kingunerisinnaasat, tassani aamma isiginiarneqassaaq, aningaasartuutinit kikkut akiliisussaassanersut.

Ilisimatitsissutigineqassaarli, Great Greenland periuseq stregkode atorlugu meqqilersuisarnissamik aaqqissuusineramik peqareemat, tassuuna oqaluttuarineqartarluni, puisit amii piujuaannartitsineramik tunngaveqarluni piniarnikkut ingerlatsinermeersuusut, Great Greenland-ip tunisassiaasa ilisarnarluartumik ilisarnaateqareernerisa saniatigut.

Naalackersuisunut ilaasortat arlallit paasitsiniaallutik angalasarnikuupput, Bruxelles-imut, Strassburg-imut aamma København-imut, soorluttaaq atorfilltat Bruxelles-imi, Rom-imi aamma Paris-imiinnikuusimasut. Bruxelles-imi Aallartitaqarfik EU-mi oqartussaaffigineqartumi illuatungeriinnik attuumassuteqartunik tamanik ataatsimeeqateqarsimavoq, tassanilu ataatsimiinnerup tullia ulloq 11. november 2008 ingerlanneqartussaalluni. Novemberip qeqqata missaani Aningaasaqarnermut Nunanullu allanut tunngasutigut Naalackersuisup Bruxelles tikeraassavaa Kalaallit Nunaanni pissusiviusut pillugit ilisimatitsisussaalluni.

Piffissanngorpoq, Kalaallit Nunaata puisinut akerliusunik tikeraartoqarnissaa, taamaalillutik nammineq takusinnaaniassamatigit pissutsit neriunartumillu pitsaannerusumik paasisinnaalissallugu, suliniut sunik kinguneqarsinnaanersoq. Taamaattumik isuma saqqummiunneqarnikuuvoq EU-mi inuit aggersassallugit eqqortunik paasisaqarniarlutik Kalaallit Nunaannut / Kalaallit Nunaata Avannaanut tikeraartinneqarnissaat, sumiiffinnut puisinniarnarup annertunerpaamik aningaasaqarnikkut aamma inuuniarnikkut aningaasaqarnikkullu pingaaruteqarnerpaaffiusunut. Bruxelles-imi Aallartitaqarfik sapaatit akunnerini aggersuni parlamentimi ilaasortanut attuumassuteqartunut il.il. qaaqquissutunik saqqummiussissaaq.

*3) Paasitsiniaanerni sunniiniarnernilu nunatta Bruxelles-imi aallartitaqarfia sunik suliniuteqarsimava qanorlu siunissami pilersaaruteqarpa?*

3-mut) Nunanut allanut Ministeriaqarfik aamma Bruxelles-imi Kalaallit Nunaata Aallartitaqarfik aalajangersimarpalaartumik Aalisarnermut, Piniarnermut Nunalerinermullu Naalackersuisoqarfik qanimut suleqatigalugu Kalaallit Nunaata isumaa erseqqissaatigisarsimavaat, tassami suliniutit piniartunut taakkulu ilaqaannut annertoorujussuarmik pitsaanngitsunik kinguneqarsinnaammat kinguneqareersimallunilu tuniniaanermut. Ilanngullugu takuuk 1-mut).

*4) Paasititsiniaanermi sunniiniarnermilu Danmarkimi nunatta aallartitaqarfia maannamut qanoq atorneqarpa siunissamilu qanoq pilersaarutigineqarfigineqarpa?*

4-mut) Kalaallit Nunaata Aallartitaqarfia Danmarkiittoq ingerlaavartumik ilisimatinneqartarpoq ilaatigut Naalakkersuisut isummernissaannut tunngavissianik ilisimatitsinernilluunniit Naalakkersuisunut puisit amii pillugit suliamut attuumassuteqartunik pissarsinneqartarnikkut. Aallartitaqarfik puisinniarneq pillugu "atuagaq qaqortumik" pissarsinikuuvoq kiisalu allakkiat attuumassuteqartut nuutinnerinik. Aallartitaqarfiup allaffia siusinnerusukkut paasissutissiinermi mappersakkanik aamma puisiniarneq pillugu allagartarsuarnik agguaassassanik pissarsisarnikuuvoq. Aallartitaqarfik Naalakkersuisoqarfiup, Nunanut allanut Ministeriaqarfiup aamma Canada-p aallartitaasa akornanni oqarasuaatikkut ulloq 29. september 2008-mi ataatsimiinnernut ataqatigiissaarisuunikuuvoq.

Kingullerpaamik Aallartitaqarfik annertuumik allakkiamik pissarsivoq puisit amii pillugit suliap killiffianik imaqtumik, taannalu aamma kalaallit folketingimi ilaasortaanut oktober 2008-ip qeqqani nassiunneqarpoq. Aallartitaqarfimmut ilisimatitsisarnissaq naatsorssuutigineqarpoq ilisimatitsisarnissaq ingerlaannassasoq immaqalu aamma ataatsimiinnernut København-imi aaqqissuunneqartunut peqataasassalluni. Naalakkersuisunit sulii Aallartitaqarfik akuutinniarneqarpoq ilisimatitsiniarluni suliniutaasinnaasunut, Aallartitaqarfiup Namminersornerullutik Oqartussanut nalinginnaasumik (praktiske) suliarisartagaanut ataqatigiissillugit.

*5) EU-kommission-ip eqqusseqqusiunnaarnissamut peqqussutissatut siunnersuutaa malillugu naggueqatigiit inuit, siunnersuummi immikkut akuerineqarlutik eqqussisinnaatinneqarnissaat periarfissatut Naalakkersuisut qanoq nalilerpaat?*

5-imut) Inuit ilaatinneqannginnissaanik taaneqartartoq, artikel 3, imatut oqaasertalerneqarsimavoq, Kalaallit Nunaannit, pisariaqartinneqartumik uppersaasersuisarnissamik meqqilersuisarnermillu aaqqissuussinerit atuutsinneqalissagaluarpata, naatsorssuutigineqarsinnaassasoq EU-mut avammut niuernerimik ingerlatsiinnarsinnaasutut imatut piumasaqaatilimmik: "Imm. 1, tassa imaappoq inerteqquteqarneq puisinit tunisassianut atuutinnigilaq, piniarnerit tunngavigalugit, inuiaqatigiit inuit qangaaniilli ileqqutoqqatik naapertorlugit ingerlattarsimasaannik, inooriaatsiminnillu ingerlatsiinnarnissaminnut iluaqutaasunik".

Taamatut "inuit ilaatinneqannginnissaanik" taaneqartartoq aamma 1983-mit peqqussutaasumi nassaassaavoq. Naalakkersuisut naliliinerat naapertorlugu taamatut ilaatitsinnginneq ilaatitsinnginneruvoq paatsuinermik tunngaveqartoq. Imatut paasillugu, EU qanorluunniit ilioraluarpat, taava puisinniartarnerit Kalaallit Nunaanni aamma Nunavummi ilungersunartumik eqqorneqartussaapput Canadami Norge-miluunniit puisit amiinik tunisassiarineqarsimasunik inerteqquteqarnerup eqqunneqarnerani. Naalakkersuisut kalaallit puisinniartarnerannut isumaa taannaavoq, soorlu Kalaallit Nunaanni pisuussutinik uumassusilinnik tamanut

piniarnermut aqutsinermullu atuuttoq. Taanna tungaveqassaaq piujuaannartitsilluni piniarnermi, mianersortumik periuseqarnissamik qulangersimaneqartoq kiisalu pisamit tamarmiusumit tamakkerlugu iluaquteqarnissamik pitsaanerpaanik atugassaqartitsinissamik qularnaarinniisoq.

*6) Siunissami nunani allani ass. EU-mi aaliangiinerit annertuut, Danmark-imut isumaqatiginniarnermik nassataqartut pissatillugit Naalackersuisut inatsisartunik peqataatitsinerunissamik pilersaaruteqarnerlutik, taamaassappallu pilersaarut tamanna qanoq isikkoqarpa?*

6-imut) Naalackersuisunit suli Inatsisartut ilisimatinneqartassapput Aalisarnermut, Piniarnermut Nunalerinermullu Ataatsimititaliaq ataatsimiititaliallu allat attuumassuteqartut aqquutigalugit. Tamakku saniatigut isumaqarpunga, inatsisartuni ataatsimiititaliaq namminneq aalajangersartarsinnaassagaat assersuutigalugu Bruxelles-imut angalanissaq EU-mi inunnik nuimanagerusunik, EU-mi siunnersuummik suliaqartunik ataatsimeeqateqarlutik. Qularutiginnigilara, Bruxelles-imi Aallartitaqarfik aammaarluni ataatsimeeqatiginninnissamik aqqissuussinernut ikiuussinnaassasoq soorlu siusinnerusukkut taamatut pisoqartarnikuusoq.

*7) EU-mi allanilu puisit amiinik nioqquteqaqqusiunnaarnissamik suliniutit pillugit nunatsinni paasisitsiniaasoqarnissaa qanoq pilersaarutigineqarpa?*

7-imut) Puisit amii pillugit paasisitsiniaanerup annertunersaa 2006-2007-mi ingerlanneqarpoq, tassani siunnersuut piareersarneqarfimminiittoq, tassalu pingaarnerpaamik sunerneqarfigisinnaasamini. Piffissami tassani pisariaqarfiusumi suliniuteqarneraavunga. Piffissami tassani oqaatigineqareersutut amerlasuunik paasisitsiniaalluni ataatsimiittoqartarpoq ministerillu akornanni aamma atorfillit akornanni arlalinnik allakkatigut paarlaasseqatigiittoqartarluni, taakkununga ilanngullugit atuagaq qaqortumik suliarinnittoqarluni. Soorluttaaq assingusunik suliniuteqartoqarsimalluni 2008-p affaani siullermi.

EU-mi siunnersuut EU-mi Siunnersuisoqatigiinni ilisimatitsissutigalugu oqallisigineqarsimavoq aalajangiiffiunngitsumik ulloq 20. oktober 2008. Tamatuma kingorna alloriarnerup tullerissavaa Avatangiisit pillugit suleqatigiissitami ulloq 11. november 2008-mi ataatsimiinnissaq. Naatsorsuutigineqassaq, suleqatigiissitaq arlaleriarluni ataatsimiittarumaartoq, kisiannili franskit EU-mi Siulittaasoqarfiata kingullerpaamik naliliineraa, kommissionip siunnersuutaa franskit siulittaasuutillugit akuersissutigineqarnavianngitsoq immaqa aamma tulliani tjekkit siulittaasuutitaqalerpata, tassami peqqussummi immikkuualuttut arlalissuit pingaaruteqartut suli amigaataammata. Nunanit ilaasortaasunit kingullermik siunnersuisoqatigiit ataatsimiinnerini apeqquaterpassuisa tamanna erseqqilluinnartumik takutippaat. Assersuutigalugu meqqilersuisarnissamik aqqissuussinermi, ilaatitsinngitsoornermi, tassunga atatillugu inuit ilaatinneqanngitsoorneranni, nakkutilliinermi, aningaasartuutini il.il.

inissinneqarsimangimmata. Naatsorsuutigineqarpoq, suliaq decemberimi siunnersuisoqatigiit ataatsimiinnerini suliarineqarumaartoq.

Aamma EU-mi parlamentip peruserisartagaa piareersarneqarpoq. Tassani ataatsimiititaliat ataavartut sisamat (4) akulerutsinneqassapput, tamarmillu immikkut oqaaseqartartussaminnik (nalunaaruteqartartussaminnik) toqqaassallutik ataatsimiititaliallu ilaat ataaseq "siuttuussalluni". Taamatut aalajangiinissaq naatsorsuutigineqarpoq 11. november aalajangiunneqarumaartoq. Kalaallit Nunaata Aallartitaqarfianut nalunaarutigineqarsimavoq, ataatsimiititalianit pineqartunit siusinnerpaamik oqaaseqaateqartoqarnissaa naatsorsuutigineqarsinnaassasoq februar/marts 2009-mi. Tamatuma kingorna suliaq parlamentimi ilaasortat tamarmik katersuunneranni taasissutigineqassaaq. Suliaq Siunnersuisoqatigiit aamma Parlamentip akornanni ataatsimoortumik aalajangiisinaanermi oqartussaaffimmut ilaatinneqarmat, oqartussaasut taakku marluk aalajangiineri tamatuma kingorna isumaqatiginninniarnikkut ataqatigiissaarneqassapput. Aatsaat inaarutaasumik peqqussutissatut siunnersuut aalajangiunneqarsimalerpat, ukiup affaanik sivilisussuseqartumik atortuulersitsiniarneq aallartissinnaavoq.

Namminersornerullutik Oqartussat ukiorpassuarni annertunerusunik annikinnerusunillu paasisitsiniaanernik suliaqartarsimapput puisinniarnellu Kalaallit Nunaannut pingaaruteqassusia pillugu atortussanik ikittuinnaangitsunik suliaqartarsimalluni. 1980-ikkunni annertooujussuarnik paasisitsiniaasoqarnikuvoq arlalinnillu 90-ikkunni, taamanikkut "pullasersorluni piniartarneq pillugu suliaq" ingerlanneqarmat. Tassunga atatillugu video-mik suliarinnittoqarpoq; "Puisi – ulluinnarni inuuniuterput" – kalaallisut, tuluttut aamma danskisut saqqummersinneqartumik, aamma Kalaallit Nunaanni natsernik qassusersorluni piniartarneq pillugu nalunaarusiortoqarpoq tuluttut, danskillu oqaasertalimmik.

Naalackersuisoqarfik arlalinnik allagartarsualiornikuvoq paasisissutissiinermi mappersakkanik oqaatsit pingasut atorlugt, taakkulu aamma agguanneqarnikuupput. Ukiuni kingullerpaani marlunni assut pimoorusaasunik paasisitsiniaasoqarnikuvoq, 80-ikkunilu paasisitsiniaanertut ajuusaarnaraluartumik annertutigingitsunik, tamatumanimi aningaasat assut killeqarmata. Paasisitsiniaarnemi "atuakkamik qaqortumik" suliaqartoqarsimavoq, taannalu danskit aallartitaqarfiinut siammartinneqarsimavoq, ataatsimiinnernilu tamani agguanneqartarsimalluni. Soorluttaaq taanna aaneqarsinnaasoq [www.nanoq.gl](http://www.nanoq.gl) atorlugu. Aamma atorfillit pimoorussumik peqataasimapput imaluunniit suleqatigiissitanut ataatsimiinnernullu assigiingitsunut ilanngussaqaqartarsimallutik 2006-2008-mi, tassani EU-mi teknikkikkut nalunaarusianik arlalinnik suliaqartoqartoq.

Namminersornerullutik Oqartussanik Great Greenland A/S pigineqarpoq, taannalu aktiaateqarluni ingerlatseqatigiiffiuvoq, ilaatigut suliassaqaqartumik puisit amiinik tuniniaanermi ussassaarinissamat. Suliassat taassuma immikkoortortaa taanna ingerlatsinikkut suliassaavoq, taannalu Naalackersuisunit

tapersorsorneqartarsimavoq ilaatigut Great Greenland A/S suleqatigalugu paasisutissat eqqortut pillugit paasisitsiniaanermik ingerlatsillutik.

Naalackersuisut paasisitsiniaanermut pimoorussamik peqataalersimanerinit puisinniarnermik puisillu amiinik iluaquteqartarnermut suli tapersersuillutik, tamanna Naalackersuisut tunngaviumik isumaannut atavoq tassalu uagut uumassuilinnik pisuussutitsinnik iluaqutiginnaasugut piujuartitsinermik periuseq aallaavigalugu.

EU Kalaallit Nunaannit puisit amiinik annertunerpaamik pisisartuunngilaq, kisiannili EU 27-inik nunanik ilaasortaqluni aalajangiissappat puisit amiinik eqqusseqqusiunnaarluni, taava tamanna tunisassianut allanut tuniluuttumik kinguneqarsinnaavoq, tassami aamma nioqutissianik arlalinnik eqqussueqqittoqartarmat assersuutigalugit puisit amiinik atisat sinaakkutissaannik pinnersaatinik.

EU-mi inerteqquteqarneq piviusunngussappat, tamanna ilungersunartumik Kalaallit Nunaannut navianartorsiortitsisussaavoq, tassami puisip amia annertuumik aningaasatigut isaatitsissutaammat pingaartumik inuiaqatigiinni kalaallini isorliunerusuniittuni. Danmarkip / Kalaallit Nunaata periarfissani tamani erseqqissaatigisarnikuuvaat, inatsisitigut tunngavissaqanngilluinnarmat puisit amiinik EU-mut eqqussuisarnerup unitsinneqarnissaanut, tassunga ilanngullugit uumassuseqarnermut tunngasortai.

EU-mi inuit ilaatinneqannginnerini inuit inissinneqarput oqaluttuarisaanikkut qangali innuttaasutut, tassani soorlu nalinginnaasumik aningaasannanniutigalugu puisinik uumasutut allatuut iluaquteqarsinnaanatik aamma imaani pisuussutinik soorlu aalisakkanik, taakkulu aataarsuarnik amerlialuttuinnartunik nerisarineqarluartartut. Ilanngullugu annertuumik qularutigineqarsinnaavoq ilaatitsinnginnermik aalajangersakkanik taakkunannga marluusunik pimoorussisumik nakkutilliisoqarsinnaaneranut periarfissaqartoqarnersoq. Peqqussutissap atortuulersinniarnerani aalajangersakkat isigineqartariaqarput sunut tamanut kalluaatigisutut, siunnersuummik nalinginnaasumik ingerlatsisinnaanissaq assorujussuaq ajornakusoortussaalluni. Piffissaq atortuulersitsiviusoq ima annertutigisunik Naalackersuisoqarfimmi aamma sulisutigut nukissanik pisariaqartitsisussaavoq, suliassallu immikkoortua taanna pilersaarusiorneqartariaqassalluni Nunanut allanut Ministeriaqarfimmi atorfilittat peqatigalugit.

Inussiarnersumik inuulluaqqusillunga

Finn Karlsen  
Aalisarnermut, Piniarnermut Nunalerinermullu Naalackersuisoq